


HO MO NYOLLA NALANENG

 Kea u leboha, Moena Neville. Lumelang mantsiboea ana, metsoalle. Ruri ke . . . Ke nka ona e le monyetla o moholo, ho ba mona tabernakeleng, bosiuung bona, ho qala letoto la likopano tsa masiu a mahlano. E se e le nakoana ke tšoare tsoeletso mona tabernakeleng. Ha rea e phatlalatsa lipampiring, kapa letho, re itsebile re ke ke ra fumana sebaka se lekaneng ho lulisa batho, hobane e nyenyane, 'me malulo a rona a fokola haholo. Empa re tla etsa sohle seo re ka se khonang ho ba amohela. Re ne re tla fumana jimi ea sekolo se phahameng mona, 'me re ne re ka e phatlalatsa, empa mono ke nako ea sekolo joale, 'me ho batla ho le thata ho e thola.

² 'Me ke tla tsamaea haufinyane, kea kholoa, ho kena boromuoenng ba ka le joalo-joalo, mose ho maoatle. 'Me ke ne ke batlile ho phutheha ho kenela setsoalle le batho bohle pele re tšelela koo hape.

³ Le a tseba, re kopana, nako le nako, 'me khetlo le leng re tla kopana khetlo la ho qetela. Ka hona re—re batla ho lula haufi kamoo re ka khonang le Morena le Lentsoe la Hae, 'me re bona Lentsoe la Hae le Itsenola, letsatsi ka letsatsi, letsatsi ka letsatsi. Ke hopotse ho ka ba molemo ha re ka tšoaara e—e kopano e nyenyane mona, re ntano rapella bakuli.

⁴ 'Me ke boleletsoe, nakoana e fetileng, ka pono eo Morena a mphileng eona, selemo nakoana e fetileng, kea kholoa, kapa ho feta moo, ke e ngotse bukeng lapeng, maloka le ho fetoha ha bosebeletsi. 'Me bongata ba lona batho ba lutseng mona . . . Nke ke ka re ba bangata. Empa hopolang mohla re ne re haha tabernakele ena la ho qala, le sa hopola pono e hlahileng hoseng mohla re ne re hloma lejoe la sekhutlo mono, mohla A reng, “Ena ha se tabernakele ea hau.” Empa A mpea tlas'a maholimō le ho bolela, ho mpoella lintho tse fapaneng tse tlang ho hlaha. Haeba le tseba, le e shebelle ha e etsahala hantle kamoo e boletsoeng. Le a bona? 'Me esale ho lutse joalo. Ka hona, ha ho le joalo, ke phomola ke tiile hore seo A se buang, ke Molimo, 'me se tlameha ho ba 'nete.

⁵ 'Me nakoana e fetileng, ke ne ke hapuo e ponong 'me ka bona e—e tente e khōlō. Oh, e ne e le ntho ea tonana, e khōlō. 'Me ke sa tsoa bua, 'me meea e mengata e le aletareng, 'me ba eka ba lla ba phahamisitse matsoho a bona, ka khutso le ka mosa. Monna ea khabane ea buang ka mosa a tla kalaneng 'me a re, “Joale ba tla etsa mola oa thapelo Moena Branham a sa itokisa.” 'Me ke ne ke eme ka mokhoa oo, ehlile, mola oa thapelo o tla be o le letsohong la ka le letšehali. 'Me ka bona letšoele la batho le batlang le koahetse boloko ba motse kapa ho feta, ba eme moleng. Ho ena

le mohahonyana, mohaho oa patsi, ka hara tente ena. 'Me mono keha ho eme mosali, monna, e mong a ngola mabitso, 'me batho ba kena ka melangoana le ka liphate, 'me ba tsoa ka lehlakoreng le leng, ba tsamaea. Be, ka ipotsa se etsahetseng ka mono. 'Me eaba Lengeloi leo la Morena, setšoantšo sa Lona le se bona mona, Sa tloha ho 'na, 'me sa ea hantle holim'a moaho o monyenyanane oo, 'me sa ema mono, eaba sea theoha. 'Me Puo ea bua, ea re, "Ke tla kopana le uena nqalong eo." Be, joale, esale ke shebeletse nako eo.

⁶ Esale ke tsoile, nakoana joale, ho phomola, ka baka la mosebetsi o tlohisang. Ka khutla.

⁷ 'Me mafelong a veke e fetileng, ra tšoara nthoana, thuto ea kereke masiu a mararō mona. Ke hore, bosiu ba Moqebelo o fetileng, hoseng ha Sontaha, le bosiu ba Sontaha, pele ho kopano ena. Ka mokhoa oa ho sisinya kereke ho kena maemong, re tle re tsoelepele ka kopano ena e tlang joale. 'Me hang kamora mona, Bosiu ba Sontaha e tla ba bosiu ba ho salisa tabernakele hantle nako e itseng, kamoo ke tsebang. 'Me joale. . .

⁸ 'Me kea tšepa 'me ke tšepa ho Molimo, hore ka nako e 'ngoe vekeng ena, ke batla ho sebelisa phaposinyana ena mona e le phaposinyana ea thapelo. Le ho kenya bakuli le ba mahlomoleng, le ho bona haeba O tla kopana le 'na, le ho qala tabernakeleng hape, ka bosebeletsi bo bocha. Ruri nka rata ho e bona e etsoa. Ha ke tsebe seo e leng sona, metsoalle ea ka. Ha ke na le mohopolo oa seo e tla ba sona. Empa Eo Ea mametseng joale, ke tšepa e tla ba ntho e fetisang ho thusa bana ba Hae ba futsanehileng, ba kulang, ba sotlehang ba letsatsi lena. Ke Mo tšepisa hore ke tla tšepahala ke be le 'nete, le ho leka ho tšepahala ho feta ka lineo tse ling tseo A li abileng. 'Me ha e ka etsahala, e tla ba 'nete joaloka tse ling. Joale lineo tse ling tseo li tiile hakaalo ka mehleng. Ua bona? Empa ke shebeletse ntho e ncha ho etsahala joale, 'me ke tšepa e tla etsahala mona. Joale, ka nahana, mohlomong bosiueng bona re tla bua re bone kamoo ke ikutloileng kateng.

⁹ 'Me ntho e 'ngoe eo ke neng ke batlile ho e etsa, ke ne ke batlile ho leka ho fumana, mohla re kenang khetlo la pele, hola nka romela mohatsa ka ka mono, 'moho le 'na ha e theoha khetlo la pele, ho bona haeba ho tla ba joalo. Haeba ho se joalo, ka hona, ho fetisa basali, re tla ba fetisa ba babeli ka nako, basali ba babeli ka nako, ba fetang. Ka baka leo ha ke re e tla sebetsa ka tsela efe feela; e le feela hore le tle le tsebe, hobane ho se ho boletsoe re shebeletse ntho e ncha ho etsahala, 'me re joalo. Empa joale ha ke re O mpoletse e tla etsahala. Moo ke boneng ponong e ne e le ka tenteng. Empa, ehlile, e ka etsahala hohle, nako efe, ka hona re e shebeletse.

¹⁰ Hona joale re tla leka ho le lumella ho tsoa phakela. Tšebeletso ea lifela, halofo ea hora, le tšebeletso ea thero, le

tšebeletso ea aletare, le joalo-joalo, hora e ka bang 'ngoe, e tla etsa hora le halofo, batho ba emeng ba tle ba se honyele mesifa; le ho khutla hosane bosiu.

¹¹ Joale, pejana re phetla Lentsoe lena la khale le bokoang, 'me re tla u tiisetša, re ke ke ra bua letho haese se leng kahar'a Seo, hoba Oo ke Motheo, 'me pele re etsa joalo, ha re inamiseng lihloho tsa rōna feela, nakoana, lentsoeng la thapelo.

¹² Molimo o ratehang, re sa eme bosiuong bona ka pel'a Sefahleho sa Hau, 'me re elelloa seemo sa rona se fokolang, hore re lerole la lefatše feela. U re hlahisitse re le libopuoā tse phelang, ho hlompha le ho tlotlisa Uena. 'Me re elelloa maphelo a rōna le bofello ba rōna bo behiloe matsohong a Hau a bokoang. 'Me re inehetse, ka tumelo, matsohong a Hau, re ntse re tšepile ho fuoa pheletso ea Bosafeleng ba rona, ho phela le Uena kamehla lefatšeng le molengoana, moo re sa tl'o rapella bakuli le bahloki. Ha ho keleli e tla rotha lerameng. Ha ho e—e motho ea fokolang, ea sosobaneng ea tla nyoloha le ka mohla. Empa mono re tla ba bacha, kamehla, 'me khanya ea Molimo e tla boba holim'a rōna. 'Me re ke ke ra hloka pholiso, hoba re tla folisoa ka Bosafeleng, kamehla. Mohla sebopuoā sena seo re leng sona joale se tla fetoloa 'me se etsoe ka 'mele o kang 'mele oa Hae ka sebele o khanyang, ke moo re tla 'Mona kamoo A leng kateng. Ho fihlela hora e bokoang eo e fihla ho tlela e mong le e mong oa rōna, re lakatsa ho etsa boiteko bo bong le bo bong boo re bo tsebang, ho tlotlisa Lebitso la Hau le leholo, ka tumelo eo U re fileng eona.

¹³ Ke bosiuong ba pele ho kopano ena e nyenyane hammoho sebakeng sena se senyenyane sa sehopotso, sehopotso sa tsoeletso ea pele eo re kileng ra e tšoara mona. 'Me mesebetsi e meholo, e matla eo U re bontšitseng eona ka letsoho la Hau le leholo le matla. Ho tloha mona ho haotse tsoeletso sechabeng ka seng. 'Me lefatše ho pota, bosiuong bona, mello ea tsoeletso e tuka maralleng, 'me banna le basali ba folisoa maloetse a bona le mafu, 'me ba tla tsebana le Molimo oa 'nete le o phelang. Oho Morena Molimo, re tšollele Moea oa Hau bosiuong bona, Morena, ka litekanyo tse khōlō.

¹⁴ 'Me haeba e khahlisa Uena, Morena, haeba e le lenaneong la Hau le Mokhethoa, re tla kopa, oho Molimo, hore ka mohahong ona U tle u qale neo e ncha ena ho sebetsa, hore bana ba setseng ka morao, ho tsoa masimong, 'me ebile bahlabani ba thapelo, ba ka bona, khetlo la pele, letsoho le leholo la Jehova le tsamaea ka tsela e ncha ena (Aba sena, Morena.), 'me le be banka-kabelo ba litholoana. Re kopa feela ka boikokobetso hore e tle e abjoe mona, ka ho tseba hore e tla ba kae-kae, hobane re utloa e le paballong ea Hau e khōlō ho etsa joalo.

¹⁵ Joale re hlohonolofatse, Morena, re sa phetla maqephe a Buka, Lentsoe la Hau le halalelang le bokoang. Meea ea rōna e buloe ho e amohela, Morena. 'Me ha litšebeletso li koaloa bosiuong

bona, 'me re qala re ea malapeng a rōna a fapaneng, re bue joaloka ba tsoang Emmause, "Na lipelō tsa rōna li ne li sa chese ka ho rōna, bosiueng bona, ha A ntse a buisana le rōna tseleng?" Hoba re e kopa ka Lebitso la Hae le bakeng sa khanya ea Hae. Amen.

¹⁶ Bosiueng bona ke khethile, palo ea Lengolo feela, litemana tse 'maloa, ha le rata ho phetla ho eona, ho Buka ea Marena, Marena a Pele, le khaolo ea 18 ea Marena a Pele. 'Me ke batla ho qala ho bala ho tloha temaneng ea 17. 'Me ke lakatsa ho nka lekhateng leo, sehlooho: *Ho Mo Nyolla Nalaneng*. Joale, lona bao le ngolang, nka se qotsa hape: *Ho Mo Nyolla Nalaneng*. Joale temana ea 17 ea khaolo ea 18 ea Marena a Pele.

'Me eareha, Akabe a bona Elia, Akabe a re ho eena, ke uena ea ferekanyang Iseraele na?

Eaba o re, Ha ke a tšoenya Iseraele; empa uena, le ba ntlu ea ntatao, ka hore u furaletse litaelo tsa MORENA, 'me hore u latetse boBaale.

Joale romela, u phuthe Iseraele eohle ho 'na thabeng ea Karmele, le baporofeta ba Baalime ba makholo a mane le mashome a mahlano, le baporofeta ba lifate tse makholo a mane, ba jeleng tafoleng ea Jesebele.

Akabe a romela ho bana bohle ba Iseraele, 'me a bokella baporofeta thabeng ea Karmele.

Elia a tla ho sechaba sohle, a re, Le tla ema nako e kae lipakeng tsa mehopolō e 'meli? Ha MORENA e le Molimo, mo lateleng: empa ha e le Baale, mo lateleng ke hona. 'Me sechaba sa se ke sa mo araba ka lentsoe.

¹⁷ Bosiueng bona re eme lintšing, re shebeletse ho etsahala, le ho phuthulla, litema tse peli tse khōlō. 'Me liketsahalo tse peli tseo tse kholo ke tsena: e 'ngoe ea tsona ke pheletso ea histori, 'me e 'ngoe ke pheletso ea nako. 'Me banna ba bangata ba baholo, ho theoaha le mengoaha, ba labalabetse ho bona hora ena eo re e atamelang joale. 'Me ha re ntse re phela litemeng tsena tse khanyang tsa letsatsi le shoang le ho chaba ha Leseli la Bosafeleng, ke utloa re phela mongoaheng o moholohali oo motho a kileng a lumelloa ho phela ho 'ona, hobane ke ho koaloha ha nako le ho nyallana le Bosafeleng. Histori e re bolella feela seo re se balileng, se bileng teng. 'Me se kamoso se letsohong la Molimo. 'Me rea fumana, kajeno, ha ho a ngoloha nalane e ngata haholo, hoba ha ke khloe e tla sebelisoa le ka mohla.

¹⁸ Liketsahalo tse kholo tsena bobeli li phallela metsing a sa tebang. Ho tea mohlala, eona . . . Kamoo koluo ea sechaba patahanang. 'Me tšireletso ea sechaba e matha e kena metsing a sa tebang. Ho hahlaula, lefatše ho pota, eka ha se sechaba sa rōna feela, empa ha ho sechaba se tsebang se ka etsoang. Ho bonahala ho hlahlile moferefere hohle. Ha ke kena Afrika, bohle ba tšaba letsoho hara batho, 'me bokomonisi bo haola le naha. Ke kena

Switzerlande, ho a tšoana. 'Me lichaba tse ling tsohle tseo ke li etetseng, ekare khotsa e sa tsitsang hohle.

¹⁹ Joale le a tseba, Morena oa rona o lekantse nako e joalo e tla fihla, ho hlahe “tsieleho hara lichaba, tlokotsi ea nako, khohlano pakeng tsa lichaba.”

²⁰ 'Me re lekile sohle se ka etsoang ke motho, hore e tšoarelle haleletsana. Empa ke lumela re ntse re qeta sebaka. Ha ke lumele re ka etsa letho ka eona. Re pheletsong ea eona feela. Re lekile nakoana, ho fumana likhosi, 'me ba sitiloe. Eaba ba leka demokrasi; ha e sebetse. 'Me re lekile. . . Ba lekile babusanosi, 'me ha e sebetse. 'Me e 'ngoe le e 'ngoe e bonahala e phallela moo ho sa tebang, nako le nako. Joale re eme motsotsong o moholo mohla ntho efe e ka etsahalang. Ho ka be ho felile, nakong ea metsotso e mehlano, sechaba se seng le se seng se ka hasana sa fetoha phofo.

²¹ 'Me haeba re le nakong eo, Kereke e tlameha e be e le hokae? Tlokotsi e kholo!

²² Ebile, hape, re fumana tlokotsi bophelong ba lelapa. Eka bophelo ba lelapa bo phallela metsing a sa tebang. Mehlang, ka lelapeng, ntate eo, hlooho ea lelapa, o ne a lula fatše hoseng, 'me a bue le lelapa la hae, 'me bohle ba ntše Bibeletse ea khale ea lelapa ba bale nakoana, 'me—'me bohle ba phuthehe tafoleng ba rapele. Ha u sa bona seo hape. 'Me hoba letsatsi le fete, 'mè a hlatsoe lijana, bohle ba bokane 'me ba bala lethoana la Bibeletse, 'me ba rapele pele ba robala.

²³ Botlokotsebe ba bana ruri e ne e le e—e ntho e thata ho e fumana matsatsing ao. Bashanyana bohle ba ea masimong ho ea sebetse. 'Me banana ba thusa mama ho hlatsoa, tlase molatsoaneng. Empa, kajeno, re tobetsa konopo e nyenyane feela 'me lijana tsohle li hlatsoitsoe. 'Me 'mè o kena koloing 'me o ile moketjaneng oa likarete, kapa o tsoile a matha literateng. 'Me —'me e—e mosebetsi o etsoa ke terekere 'me ha re fumane letho haese sehlopha sa batho ba botsoa, ba liilang hohle.

²⁴ 'Me bophelo ba lelapa bo nyemotsoa hona, ho fihlela Bibeletse e behiloe morao, ho fihlela ba tlameha ho tsoma hora ho e fumana, malapeng a mangata Amerika. Ba ea kerekeng ka Sontaha hoseng, borapeling ba bona, metsotso e ka bang mashome a mabeli. 'Me ha molisa a nka metsotso e ka bang mashome a mararō, o biletsoa lekhotleng. Ke eng? Bophelo ba lelapa bo a fela.

²⁵ Ntate le 'mè ba ne ba ratana ba hlomphana ba thabelana. 'Me mohla a tsofetseng a pulufetse, a sosobane, sefahlehonyana sa hae se sosobane, 'me ligalase tsa hae li leketlile nkong ea hae, ntate a mo rata joaloka ha a ne a le mocha 'me a le motle.

²⁶ Empa, kajeno, ha ke a ikemisetsa ho nyatsa, empa ha a tsofala, o mpa a mo ananya ka motlolo o mocha. Ho bonahala joalo, joaloka ho ananya makoloi kapa ho hong. Ekare lerato leo

la lelapa la makhonthe ha le sa le teng. Ntho e etsahetse feela; bophelo ba lelapa bo a fela. Ha re sa na lehae la khale la Amerika joaloka mehleng, lilemong tse ngata tse fetileng.

²⁷ Ntho e 'ngoe eo ke ratang ho e bua, ke ntho e 'ngoe e felang, eona, setsoalle se a fela. Ha ho bonahale re na le metsoalle eo re neng re e-na le eona mehleng. 'Me metsoalle ea rōna ha se metsoalle e tšepelang joaloka mehleng. Mehleng, ke sa hopola, ha motho a kula tikolohong, e mong le e mong a ba etele 'me ba ba thuse ka mosebetsi 'ohle oa bona, 'me ba thuse letsoho ka hofe ho ka etsoang. Ho lula le bona bosiu bohle ka nako e 'ngoe. Joalokaha ke buile khafetsa, ke 'nete, hoo, re batla re sa tsebe moahisane o shoele pele re e bona pampiring. Setsoalle!

²⁸ Ntate o tšoare senotlolo sa ntlu, le mama o tšoare senotlolo. 'Me bobeli ba tsoile ba tsamaile, halofo ea bosiu. 'Me bana, ha ba tsebe moo ba leng teng. Le bana ba banyenyane ba na le mohlokomeli oa bana. 'Me bophelo bo pheloa joalo.

²⁹ Na le a tseba Bible e lepa lintho tsena tsohle? Joale ke eng? Ke hore re eme boemong re bohile lintho tsena li fela.

³⁰ Ha re nkeng bophelo ba kereke. Ke hona moo e qalileng teng. Bophelo ba kereke bo a fela. Batho ba nka kereke feela, kajeno, e batla e le seseto, joaloka sefika se halalelang. Ho ea lula ka kerekeng, metsotso e mehlano, 'me, "Ke phethile borapeli ba ka." Ho lefa monehelo oa hau o monyenyane, e ka bang eng, ho lefa molisa. Haeba ba sa e khone; ba hlophisa lijonyana tsa mantsibuea, 'me ba e nehela molisa. 'Me haeba a sa khotsofala, o hohobela nqa e 'ngoe e tla mo lefa moputso o molengoana. Ekare molisa a sa bitsoa ka Khalalelo hape. Ekare e qala e le tekete ea lijo ho molisa. Hoo, hohle moo batho ba mo nyehelang chelete e ngata, ke eo a tloha. Ha e a lokela joalo.

³¹ Eka khona monna a biletsoe sehabeng ke Molimo. 'Me haeba a ne a tlamaha ho robala mono joaloka Elia, qhooeng ea thaba, molatsoaneng oa Kerithe, 'me a lebeletse makhoaba ho mo fepa, o loketse ho lula ho fihlela thomo ea hae e Khethehileng e phethiloe. Ho sa tsotelehe haeba a fumana peni, kapa che, eka khona e be pitso ea Molimo, pele.

³² Empa eona, ka chebeho, e fetoletsoe pitsong ea chelete, kapa maemo a holingoana le ntho e kang eo, kapa ho fetoha motho ea tummeng le kereke e kholoanyane, kapa ntho e kang eo.

³³ 'Me hape kereke, ka mono, e a lahletse marapo. Ba qala ba qepha. E shebeng ha e phutholoha feela.

³⁴ Joale ke sa le tlasa lilemo tse mashome a mahlano. 'Me ke sa hopola ke etela kereke ea Baptise le likereke tsa Methodise, le ho ba shebella tsoseletsong ea mehla-ea-khale, mohla ba neng ba hooletsa 'me ba rorisa Morena, le ho ea holimo-le-tlase lipakeng tsa litulo le ho qophella baetsalibe aletareng. Ha u sa bona seo kae kapa kae. Ba ne ba tloaetse ho tšoara likopano tsa mehla ea khale tsa thapelo mehleng ea tsoseletso, 'me moetsalibe

tikolohong, moshanyana kapa ngoanana, 'me bomme bao ba holileng le bontate ba ne ba rapela ka thata hoo ba neng ba rapella bana bao ho ahlolola ke kholiseho, 'me ba ne ba theohela aletareng, 'me ba tla ho Kreste.

³⁵ Empa ha u sa e bona. E bonahala e phallela metsing a mohlanapana. Ha e bonahale e lokela ho ba ka mokhoa oo.

³⁶ 'Me e ne e le tloaelo hore boholo ba likereke, lilemong tse fetileng mohla ba neng ba tsoara tsoseletso kerekeng e le 'ngoe, likereke tse ling tsohle li ne li sebetsa 'moho. 'Me ba kene ba thuse, ba romele litho tsa bona, le ho koala likereke, le ho tsoara tsoseletso. Ha le sa e bona hape.

³⁷ Joale ho etsahetse'ng feela? 'Me le tla etsa'ng ka eona? Ke ho phethahatsa Lentsoe la Molimo o phelang feela. 'Me e supa, lits'iea tse peli: e 'ngoe ea tsona, nako e a fela; le e 'ngoe, ho Khutla ha Morena Jesu. Hoba Moea o Halalelang o buile ka ho hlaka le ho re, "Matsatsing a qetelo likereke e tla ba baithati, baikhohomosi, ba ratang menate ea nama ho feta ho rata Molimo; ba se nang ho tšepaha, baetseletsi, ba sa tsebeng ho itsoara, le ba hloelang ba molemo." Kahoo haeba Bible e boletse esale pele hore lintho tse joalo li tla etsahala, re ka lebellang hofe ho etsahala haese hoo? "Ba nang le sebopeho sa borapeli, ba mpa ba latola Matla a jona."

³⁸ Haola le sechaba sena kajeno, lichaba tsa rōna, le ho fumana balumeli ba tlang seatla ba lumelang; Ke bolela, balumeli ba sebele ba lumelang hore Jesu Kreste o hlile o a phela. Le a bona, ba fetotse kereke sesèto feela. Re fetile ho eona, matsatsing a 'maloa a fetileng, thutong ea rōna. Re e lahlela kerekeng ea Katolike, lisèto tsa bona, 'me ba se khumamela ha ba feta kerekeng. 'Me Maprotestanta a mabe hakaalo, ba kena mono hang ka nako. 'Me mohlomong ba bang ba bona ba tsamaea hang ka selemo, 'me mono ke ka Paseka.

³⁹ Ke utloile moreri nakoana e fetileng mona, motseng, ea entseng tlhahiso ena. A re, "Ke boletsetse batho ba heso bohle, hoseng ha Paseka, 'Keresemose e monate.'" Ho re, "Ha ke sa tla ba bona ho fihlela Keresemose kapa Paseka e tlang. 'Keresemose e monate!'"

⁴⁰ 'Me re sa eme mona, re shebile lintho tsena li phutholoha, le e mong le e mong oa rona batho ba busoang ke lefu, 'me re a tseba hore ntho e 'ngoe e tlamehile ho etsahala. E ke ke ea tsoelapele tjena.

⁴¹ Motho e mong le e mong ha a na nako ea ho emisa metsotso e mehlano. Ba khothometsana feela 'me ba matha, 'me ba potlaka 'me ba hatellana, seterateng. Eitse ha bana ba nyoloha 'milakholo thapameng ena, ke ne ke etla. . . Kapa, motšearo o moholo, e ne e le 'ona. Ke ne ke tsoa New Albany. 'Me leleiti ke lena le theoha ka tsela, har'a bana bao, nka re. . . tulong ea limaele tse mashome a mabeli, limaele tse ka bang mashome

a tšeletseng kapa mashome a supileng ka hora, ka lebelo la bokhoni ba hae. 'Me o ea kae? Metsotsong e 'maloa, ka re, "U nahana'ng ka taba eo?" ho motho ea neng a ena le 'na. Likoloi tse ling tse peli ke tsena li etla li beisa, makoloi ana, hantle feela har'a bana bao. Tseleng ea rona mono moo re phelang teng, hoseng, ekare tsela ea mabelo; ho tlameha ho potlakela hae ho hlatsoa lijana, kapa ho mamela Arthur Godfrey, kapa ho hong. U ea kae? Molato ke'ng? Se ferekantseng ntho eohle, ke hobane banna le basali ba fetohile barati ba lefatše lena la joale. Ntho e ka sehloohong, e ka ba ho tla hae ho tla bala Bibe le ho ba le nako ea ho rapela.

⁴² Ke hopola 'mè oa John Wesley, Susanne. E ne e le 'mè oa bana ba leshome le metso e supileng. Athe o ne a khetha nako, ha ke nahana, lihora tse peli kapa tse tharo letsatsi le letsatsi thapelong. 'Me a holisa a hlokomela bana ba leshome le metso e supileng, ho hlalisitseng e mong oa bareri ba baholohali lefatšeng, le e mong oa bangoli ba baholo ba lifela ba letsatsi leo, Charles le John. Hobane, o khethile nako ea ho sebeletsa Molimo, 'me a sa lika-like linthong tsa lefatše.

⁴³ 'Me ha re bona motheo oa sechaba sa rōna, motheo oa lelapa la rōna, motheo oa kereke ea rōna, o tetebela, joale ka hona, baena, re ka etsa'ng? Joale ka hona, ke batla ho bua sena. Oh, hola lentsoe la ka le ne le ka tsoibileloa lefatšeng! Re saletsoe ke motheo o tiileng, 'me ke Lentsoe la Molimo le bokoang le halalelang, Bibe le. Hoba maholimo 'ohle le lefatše li tla feta, empa Lentsoe la Molimo le ke ke la feta le ka mohla. "Me holim'a Lefika lena," Molimo o boletse, "Ke tla haha Kereke ea Ka, 'me likhoro tsa lihele li ke ke tsa E hlola."

⁴⁴ Ka hona ke monyetla o bokoang hakakang ho rōna bohle, ho nanabela le ho tsoara Bibe le ea Molimo ea khale e molemo, le ho phetla maqephe, le ho tseba hore re bala 'Nete ka kotloloho. Le ho bona hobane linako tsena li etsahetse matsatsing a fetileng, hoba e bua ka Molimo oa histori. 'Me mokhoa o le mong feela oo re ka khonang, ho lumellana le litsela tsena, kapa ho—ho kena moleng, ke ho bitsa, ho tsoa historing, Molimo oo oa histori. Hoba matsatsing 'ohle, tšenyehong ea moroallo, pele Krete a fihla, le liketsahalong tse fapaneng, ha A hlolehe le ka mohla, ha A bitsoa. O nepile kamehla.

⁴⁵ Ke nahanne ka nako joale, mohla sechaba se ne se le kholehong. E ne e le Israele. 'Me ba ne ba le tlase Egepete 'me ba thatafalitsoe 'me ba le botubong, ho sebeletsa Baagepete. Ea ka motho e mong le e mong o kenoe ke mohatsela. Na le tsebile Israele e hlotse Egepete habeli ho feta ho tloha United States e le sechaba? Ha re eso tlote lilemo tse ka bang lekholo le mashome a mahlano kapa mashome a supileng, ntho e kang eo. 'Me ba qetile lilemo tse makholo a mane le mashome a mabeli bokhobeng, kapa tlase Egepete. Empa ha fihla nako, ea ka litšepo tsohle li felile.

46 Empa ha ba le monna a le mong le mosali ba bonahetseng ba na le tumelo ho Molimo oa histori ea buileng le Abrahama mehleng ea tlokotsi, 'me ba lumetse ba ka bitsa ho Eèna 'me O tla arabela. 'Me e le Ham- . . . Amrame le Jokobeta, mohatsa Ham- . . . Amrame, 'mè le ntate oa Moshe. 'Me joaloka mona, nakoana e fetileng, ha ke rera ke taka papiso ea kamoo Amrame a neng a fihla hae bosiu, 'me a re, "Jokobeta, ke khathetse haholo." 'Me metopa e le mecha mokokotlong oa hae, ho tsoa e— e sephaling sa motobi.

47 'Me a lule fatše ka mamello, mohlomong, le ho thoba e— libaka, le ho lla le ho re, "Oh, Amrame, na ha ho letho le ka etsoang?"

48 Ke mo utloa a re, "Oh, moratuo, holane oa ba le 'na kajeno, oa ba bona ba shapa bashanyana bao, ba leka ho hula meroalo eo. Empa ba ne ba sehloho. Ba ba tsoara eka hoja e le liphoofolo. 'Me bao ke bahlankana ba rōna ba Iseraele. Na ha ho letho le ka etsoang?"

49 Ke seo ke ipotsang sona hona joale. Ho bona bashanyana ba rōna ba lilemong tsa bocha, e tla ba banna le basali ba hosane, chacha ea rōna e ncha kajeno. Moriri o lepeletse molaleng oa bona, le marikhoe a leketla linokeng tsa bona, ba suntse bistolo lephakong la bona, sakrete lehlakoreng la melomo ea bona. E tla ba eng? E sa ntse e le bokhoba tlasa liabolosi. Na ha ho letho le ka etsoang?

50 'Me Amrame, e ka ba a le mong sechabeng, o ne a hloa methati e menyenyane, ho sa tsotellehe hore o khathetse hakae. Mono, bosiu ka bong, o ne a bitsa Molimo oa Abrahama, Eo a ithutileng hore o tllile ho Abrahama, le ho tla ho Jobo, le ho tla ho Isaaka, le ho tla ho Jakobo, lihoreng tsa tlokotsi. 'Me, ruri, haeba E ne e le Molimo letsatsing la bona, E tla ba Molimo letsatsing leo.

51 'Me haeba E ne e le Molimo letsatsing la Moshe, Ke Molimo kajeno. O mpa a hloka ho nyolloa nalaneng, le ho biletsoa temeng ho nka khato.

52 'Me ke bona Amrame, bosiu ka morao ho bosiu, ho sa tsotelehe o khathetse hakae; hoo ho pakile tumelo ea hae ho Molimo oo.

53 Empa, kajeno, batho, haeba ba sa fumane sohle seo ba se kōpang, khetlo la pele ha ba rapela, ekare ba Mo hopola a shoele. Seo re se hlokang ke banna le basali, kajeno, ba moea o sebete, banna le basali ba ikemiselitse ho tiisetse, ho fihlela ba bona Molimo o phelang ka 'nete, o nka khato, ba ke keng ba nka "che" e le karabo. Ba ikemiselitse ho lula le eona. Haeba ba kula, 'me ngaka e boletse hore ba ke ke ba fola, koana Ntho e ka ho bona e ba bolella ba tla fola. Tiisetse, ho sa tsotelehe se etsahalang! Na u ingolisitse le likereke tsa lefatše la bolumeli, hoba u monye matla a hau ohle ho tloha tulong ho ea tulong, 'me u sa ntse u sa

fumane phomolo? Molimo o sa le teng o arabelang thapelo le ho pholosa sebeng.

⁵⁴ 'Me joalokaha re bona, Amrame, masiung ao a saretsoeng, mokokotlo o fopha mali, a boela a hloa methati, ho fihlela hora ea bobeli le ea boraro mesong, a rapela, 'me eka o bua le moea feela. Tlase pelong ea hae ea Bojuda ho tuka tumelo e ke keng ea pheuloa ke meea efe ea pelaelo.

⁵⁵ Re hloka banna le basali ba mofuta oo ho hlaha temeng kajeno. Haeba A sa arabe bosiu bona, O tla araba hosane bosiu. Haeba A sa arabe selemong sena, O tla araba selemong se tlang. Hoba, Ke Molimo; e molimo *feela*, empa *ona* Molimo.

⁵⁶ 'Me re a 'mona, bosiu ka morao ho bosiu, ha Amrame a hloa methati. 'Me Jakobeta a mo atamela a re, "Amrame, moratuoa, esale u lutse holimo mona u rapela bosiu bohle. Hobaneng u sa bolelle bashanyana ba bang moo o sebetsang teng, 'me ba rapele nakoana?"

⁵⁷ "Be, moratuoa, ho ka thoeng haeba ba sa e etse? Motho e mong o tlameha ho e etsa. Motho e mong o tlameha ho rapelisisa."

⁵⁸ Mokreste e mong le e mong o lokela ho ikutloa joalo bosiu bona; e seng ho emela motho e mong, empa ho nka sebaka se kapele, ka borona, le ho feta. Haeba re lumela Bibeletse e le nalane, hape ke Buka ea boporofeta e bolelang 'ona Molimo oo o tla hlaha matsatsing a qetelo. 'Me ke nako ea ho fihla ha Hae temeng.

⁵⁹ Ke seo Amrame a se tsebileng. Hore Moshe o ne a porofetile . . . Kapa, e seng Moshe. Ntšoareleng. Abrahamama o ne a filoe tšepiso ke Molimo ona oa histori, Ea sa arabelang thapelo lilemong tse makholo a mane, kamoo re tsebang. Empa O entse tšepiso e reng O tla ba ntša.

⁶⁰ 'Me, ka chebeho, re fumane Molimo o khutsitseng nako e telele, empa hora e fihlile moo A tlang ho hlaha sebakeng.

⁶¹ Bosiu bo bong mohla Amrame a rapetseng, mohlomong, lilemo tse 'maloa. 'Me joale moriri oa hae o ne o pulufala, 'me ho se tokoloho, empa ho ntse ho mpefala feela. Bosiu bo bong a kena mosebetsing ka botlalo. Ke kamoo re lokelang ho e etsa; ho itahlela ka setotsoana hantle. A re, "Molimo, U tšepisitse sena. 'Me esale re e shebeletse. 'Me re bona lipontšo tsohle mona, 'me nako e atametse. Ke nako ea hore U etse ho hong ka eona."

⁶² A sa lutse thapelong e tebileng, a rapela ka pelo eohle ea hae, a sheba, ho emeng kounq. A pikitla mahlo a hae a boela a sheba hape. Lengeloi le ne le eme mono le tsohutse sabole. A re, "Tokoloho e a tla. 'Me u tla tlisa mora lefatšeng, 'me ke eena ea tla ba loela." Ua bona?

⁶³ Molimo o arabela thapelo kamehla, ha A etse joalo? Hola re ka tiisetse feela!

⁶⁴ Moshe, mohla a ne a etella bana ba Iseraele pele, ka botšepahi, ho kena lefeelleng, 'me a fihla Leoatleng le Lefubelu.

Le lithaba ka lehlakoreng le leng, le mahoatata ka ho le leng, le lebotho la Faro ka *mona*, 'me Leoatle le Lefubelu le ba eteletse pele. 'Me ba ne ba tsoasitsoe mokhamong o monyenyanane. Eka esita le tlhaho e ka hoeletsa. Ho tla etsahalang? Ho felile ka bona. Lebotho la Faro, ka mashome a likete, ho ba riptlela fatše.

65 Empa batho ba etsa'ng? Ba qala ba korotla ba tletleba. "Oh, ho ka be ho bile molemo hola ra itulela tulong ea rōna."

66 Empa e mong har'a batho bao, ea tukisitseng mollo oa tumelo ea Molimo pelōng ea hae, ea lumetseng Molimo oa histori a ka hlaha temeng hara mathata a mofuta ofe. Moshe a ema a phahamiselitse Molimo matsoho a hae, a rapela ho fihlela Molimo oa histori o hlaha temeng ho ba Molimo letsatsing la joale. 'Me A bula tsela, 'me Iseraele ea parola metsi, mobung o omileng.

67 Oh, ha se khale ka morao ho moo, ho fihlela Joshua a tataisetsa sona sehlopha seo, kapa bana ba bona, Jordane. 'Me e ne e le ka khoeli ea 'Mesa mohlal linoka tsohle li phophomang, 'me Jordane e le bophara ba eona makhetlo a mahlano. Ekare moetapele ea khabane oa sesole a ka be a ba tlisitse mono ka mokhoa o fapaneng le oo. 'Me e ne e le ka eona nako eo, mohlal ho seng monyetla oa ho e tšela. Empa Joshua a hopola Molimo oa histori o ne o le teng, lilemo tse mashome a mane pele, o phetlileng Leoatle le Lefubelu, 'me a bitsa Molimo oo. 'Me Molimo oo oa theoha ka matla a maholo, oa fetoha Molimo mathateng a joale, 'me oa bula Jordane oa ba tšelisa.

68 E ne e le lilemo tse ngata hamorao, mohlal palothero ea rōna, bosiung bona, palo ea sehlooho sa rōna, mohlal Elia a boneng thohako ea sechaba seo, 'me a le holim'a thaba, 'me makholo a lilemo thapelo e ne e sa arabeloa Iseraeleng. Koana, Elia o ne a tseba Molimo oa histori o ka hlahang temeng o le teng. 'Me a phephetsa lefatše le sa lumeleng ho ema ka pel'a Molimo ona le ho bona ea tlang ho arabela ka mollo. 'Me Molimo o ka sireletsang bana ba Baheberu seboping sa mollo oa theola mollo oa chesa sehlabelo.

69 Hape ha se khale ka morao ho moo ha monna a ne a eshoa, ea bitsoang Lazaro. 'Me ha eba le Molimo o sa ntseng o phela, o nong o ka isa Henoke Lapeng a sa bone lefu, le ho nyolla Elia ka koloi ea mollo. 'Me O ile a biletsoa temeng, horeng e lefifi ea lefu, 'me A itšoara kamoo A neng a ka etsa nakong efe. Koana, E ne e le Molimo oa nalane, empa o tsohile nalaneng ho ea tlokotsing ea joale.

70 E ne e le tlase pel'a khoro ea Jeriko moo monna oa sefofu a lutseng pel'a tsela, a lla. Litšepo tsohle li timile. Ha ho lingaka tse ka mo thusang. Chelete ea hae e sebelisitsoe. Ho se letho le mo saletseng haese ho lula mono le ho lora matsatsi a 'maloa, ho fihlela lefu e le phomolo e monate. 'Me tsatsi le leng, ho theoha

ka tsela, Molimo oa histori oa fihla temeng, tsielehong ea joale. Molimo o tutubolotse mahlo a lifofu.

⁷¹ O ka tlung ea Jariuse, moo lingaka li hlolehileng, 'me ba khutlisa ngoanana e monyenyanane ho e...ho shoa. 'Me lefu le ne le kene le nkile moputso oa lona o babang, 'me le nkile ngoana a le mong, lelapa, ngoanana ea leshome le metso e 'meli, a mo robatsa liphatang. Mohla morerinyana ea robehileng pelō a tlamehang ho tēla bolumeli ba hae le metsoalle ea hae eohle, empa a hopola Molimo oa histori o nong o ka tsosa bafu. 'Me a tloha ho ea Mo batla.

⁷² “Batlang, 'me le tla fumana; kokotang, 'me le tla buleloa; kopang, 'me le tla neoa.” E sa ntse e le Molimo o tšoanang.

⁷³ Mohla Molimo ona, o ahileng 'meleng o bitsoang Jesu, Mora Molimo, mohla A ne a biletsoa temeng, ho bitsoa nalaneng, Molimo O nong o ka tsosa bafu Testamenteng ea Khale, ho busetsa ka moporofeta bophelo ho lesea le shoeleng. Molimo oo o ke ke oa shoa. Ke Molimo oa Bosafeleng.

⁷⁴ Lesea leo le ne le robotse mono betheng, le sataletse. 'Me Jariuse e monyenyanane o tsebile Moshuneme a khutlisitse lesea la hae, a re, “Molimo oo oa histori, hola A ka biletsoa temeng, esale Molimo oo kajeno.” 'Me ha a ntse a batlisisa, o ne a utloetse ka Monna ea itseng—Monna ea ipoletse a na le matla, 'me e le Jesu oa Nazaretha, Eo ba mo hloileng bohle. Empa a 'Miletsa temeng, hoba E ne e le moemeli ea haufi ka ho fetisisa eo a neng a ka mo fumana oa Molimo tsatsing leo, Molimo oa Molimo o phelang. 'Me mohla A neng a biletsoa temeng, 'me Molimo oa histori o bitsitsoe, O sebelitse joalokaha A sebelitse mohla A buang le Elia ka lesea le shoeleng leo.

⁷⁵ E reng ke bueng hape ho feta kajeno, moena oa ka, khaitseli, letsatsing lena la joale mohla tlokotsi, holim'a mofetše o ja lefatše, le maloetse a mefuta eohle; 'ona Molimo oa histori o hloekisitseng molepera, oa folisa bakuli, le ho tsosa bafu, esale Molimo oo kajeno. O emetse batho ba Oona ka tjantjello ho 'Miletsa temeng ea khato.

⁷⁶ Eena Ea neng a ka tšoarela seotsoa ho feba hasupa ka letsatsi; Ea neng a ka hloekisa moetsalibe ea soto ka ho fetisisa le ho mo soeufatsa joaloka mohalalitoe; 'ona Molimo oo oa histori o a phela kajeno, ho hloekisa pelo e 'ngoe le e 'ngoe e ntšofalitsoeng ke sebe le ho se lumele.

⁷⁷ Monna o ne a ena le moshanyana ea tšoeroeng ke sethoatho tsatsi le leng, 'me a mo isa kerekeng, 'me barutuo ba hobela ba mo hlabela litlatse, nakoana, 'me ha ho a thusa letho. Empa Molimo oa histori o sa ntse o phela. A ikemiselitse ho Mo fumana. A 'Mona a theoha thabeng, a mathela ho Eēna, 'me a re, “Morena, nkhouhele. Liabolosi o nkile ngoana ka, 'me o a tšerema 'me o oela mollong.”

78 Jesu o itse, “Nka khona, ha u lumela.” Ha u lumela eng? Ha u lumela Molimo oa histori o sa phela le kajeno. 'Me A biletsoa temeng, eaba sethoathoa se tlohela ngoana.

79 Oona Molimo oo o a phela kajeno; mohla likereke li hlolehileng, mohla lipolotiki li hlolehileng, mohla ntho e 'ngoe le e 'ngoe e hlolehileng, 'me motho a hlolehile, 'me ntho e 'ngoe le e 'ngoe e hlolehile. Molimo o ke ke oa hloleha. Ke Molimo oa Bibebe ena ea khale, e mokokotlo o motšo. Tšepiso ea Oona e tiile joaloka mehlang. 'Me ke nako ea hore batho ba Hae ba Mo bitse, ho Mo tsosa nalaneng. Hoba ho ngoliloe, “Jesu Krete eena maobane, kajeno, le kamehla.” Ke Molimo oa histori, 'me Ke Molimo oa nako ea joale.

80 “'Me matsatsing a qetelo,” O itse, “Ke tla tšela nama eohle ka Moea oa Ka, 'me mehlole le meeka e tla tsamaea le ba lumelang; hobane ka Lebitso la Ka ba tla leleka batemona; ba tla bua lipuo tse ncha; ha ba tšoara linoha, kapa ba noa lintho tse boiaeang, li ke ke tsa ba ntša kotsi; 'me ha ba bea bakuli matsoho, ba tla fola.”

81 E ne e le Molimo oa histori ea tšepisitseng, 'me kajeno re batho ba makhulo a Hae. Re linku tsa mohlape oa Hae, 'me O re emetse ho ema le ho 'Miletsa temeng. Mo biletseng temeng. Mo shebeng ha A nka khato. Mo shebeng ha A etsa tse phahameng. Mo shebeng ha A etsa ntho eo motho a tla e makalla, le ho ingoaea lihlooho, 'me ba sa e utloisise. Ke Molimo oa histori, le Molimo oa letsatsi la joale. O emetse ho bitsoa nalaneng.

82 Re se ke ra Mo sheba. . . Molimo oa histori o re thusa'ng haeba E le Molimo oa histori feela? Molimo oa histori o ka be o thusitse Amrame le Jokobeta ka'ng? Molimo oa histori o ka be o thusitse Moshe ka'ng? Molimo oa histori o ka be o thusitse Lazaro ka'ng? Ke molemo ofe oa nalane (o entsoeng) oo Molimo a neng a ka o etsa ho sefoku Bartimeea khorong? 'Me Molimo oa histori o ka u thusa ka'ng, bosiuong bona, haeba E se eena kajeno?

83 Esale Eena kajeno. O tšoarela libe tsa rona tsohle, le ho folisa maloetse a rona ohle. Molimo oa histori, o bitsitsoeng nalaneng, O tla chaba letsatsing lena la Leseli. Eng? Mohla nako e felang, mohla lipolotiki li felang, mohla bophelo bo felang, mohla sohle se felang, Jesu o tla Leseling. Mohla ntho e 'ngoe le e 'ngoe e fihlang pheletsong ea eona, O sa ntse a phatsima, “Mohalaliteo oa Phula, Naleli e Khanyang ea Meso.”

84 Esale Eena maobane, kajeno, le kamehla. Bitsa Molimo oa histori feela, 'me u Mo shebe ha e-ba Molimo oa joale, ea tsositsong nalaneng, ho phatsima joaloka ha A entse mohlantsoe. O tla itšoara ka ho tšoana. O tla etsa ka ho tšoana. O tla tšoarela ka ho tšoana. O tla folisa ka ho tšoana. Lereko la Hae le a tšoana. Boithatelo ba Hae bo a tšoana. 'Me Matla a Hae a a tšoana. O a tšoana. O emetse ea rōna. . .

⁸⁵ U ke ke ua 'Mitsa ka melomo ea hau. Ha A tle ka tšebeletso ea melomo. O tla ka tumelo. Ha tumelo ea hau; e seng thapelo ea hau e telele, ho tima ha hau.

⁸⁶ Empa O tla ka tumeloana eo, e lerootho e tlase moeng oa hau, e ka tšoarang ea re, "Nthoana eo esale e le teng, e ntlisitseng tabernakeleng ena bosiuung bona, e ka hotetsa moea oa ka bocha, e ka nthomela hole le mona, ke tuka ke bina, joaloka linonyana tsa sebaka." Hobaneng? Ke Molimo oa histori le Molimo oa letsatsi la joale. O emetse ho bitsoa. Bitsa Morena. O tla u utloa. Bua le Eena, ka pesalema. Rapela Eena 'me u Mo lumele. O tla arabela.

⁸⁷ 'Me mantsoe ana ke a bua, ho koaleng. Ke morero oa kopano ena, bosiuung bona. Ke ka hona kopano ena e qalileng. Ke lumela Molimo o mpoletseng, lilemo tse mashome a mabeli a metso e supileng tse fetileng, mohla re ne re beha lejoe lena la motheo koana, hore ke tla bolela Evangeli lefatše ho pota. O e phethile. Eitse ha ba tšeha 'me ba re, "U ea kae, Billy, ka thuto ea hau ea garata ea bosupa?"

Ka re, "Ke ea ka Lebitso la Morena Jesu."

⁸⁸ Mohla ke ne ke rera thero ea ka pele ke tloha, lilemo tse leshome le motso o mong tse fetileng, sefaleng sena, 'me Mof. Gertie a lutse mono, a letsa seo, *Lumela Feela*. 'Me seqhobane se sehlo sa ema mono, joaloka ha ke rerile ka sona, Davida le Goliathe. Mahlale a ne a le teng lefatšeng le lehlo le tsejoang, ho nyatsa pholiso ea Khalalelo le ho e hlabisa lihlong. 'Me motho e mong le e mong a mpoella, "Moshaana, o tla peperana kantle mono. Ba tla u lahlela teronkong. Ba tla etsa *sena, sane*, kapa se *seng*. Empa Molimo oa histori o ne a kene temeng koana, 'me a mpoella ho e etsa. 'Me ka e etsa ka mohau oa Hae le lereko la Hae. Oona Molimo oo e neng e le histori, ea lilemo tse leshome tse fetileng, o boetse o hlahile temeng. Ruri joalokaha A phethile seo, O tla phethisa sena. Ke Molimo oa histori, 'me Ke Molimo oa letsatsi la joale. Ha A oitsele kapa ho robala. A ke ke a shoa, hoba A sa ba le qalo kapa qetello.

⁸⁹ Lebakeng la hau, bosiuung bona, motsoalle oa moetsalibe, maikutlonyana ao a hlohlotsang pelō ea hau, a u bolellang hore esale Eena, a u bolellang hore A ka u lokolla moroalo o mong le o mong le moroalo o mong le o mong, le sebe ka seng seo u se entseng khahlano le Eena.

⁹⁰ U ka beha tšepo ea hau ho eng? Eseng le holima lelapa la hau, e seng ho mosali oa hau, e seng lelapeng la hau, 'mè kapa ntate.

Litšepo tsa ka ha lia hahuoa holim'a letho le katlasana

Haese Mali a Jesu ka ho loka;

Mohla tsohle tse likileng moea oa ka li helehang,

Joale ke tšepo ea ka eohle le ho tšiea.

Re ema, holim'a Kreste, Lefika le tiileng leo;
Mobu 'ohle ke lehlabathe le tebang.

⁹¹ Kereke, motsoalle, e ka bang eng, tsohle li fihlela pheletso. Empa O phela kamehla le mehla. 'Me kahobane A phela, re phela le Eena.

⁹² U ka ananya ka'ng? U ne u ka nehela'ng? Ho ka thoeng ha Molimo a u bitsitse bosiuung bona ho arabela Kahlolong? U ka etsa'ng ka eona? Na u beha litšepo tsa hau sechabeng? Se a pshatleha, joaloka tse ling tsohle. Ho beha litšepo tsa hau likhethong tse itseng tse tlang? Banna bao, ha ke na letho khahlano le bona, empa ke batho ba busoang ke lefu 'me ba tla tsamaea. U ke ke ua tšetleha litšepo tsa hau ho letho ho hang, le tlang ho tiisetsa, empa Molimo oa histori Ea tšepisitseng A tla hlaha. 'Me tsatsi le leng le bokoang. . .

⁹³ Ba ka 'na ba u isa koana 'me ba tšela mobu holim'a hau, mopati, empa Monyolli o tla fihla le leng la matsatsi ana. Mopati o tla u theola, empa Monyolli o tla u nyolla ka 'nete. "Hoba ba shoetseng ho Kreste Molimo o tla ba hlahisa le Eèna mohla A tlang." Hoba Ke Molimo oa histori joale, ho ba bangata, empa E tla ba Molimo oa letsatsi la joale ha u Mo amohela joaloka Mopholosi oa hau 'me u Mo fumana e le sebele pelōng ea hau. Ntho e tla ba teng ka ho uena e u bolellang. U ka tšoha u sa sisimohe maikutlo. U ka tšoha u sa lle. U ka tšoha u sa bue ka lipuo. U ka tšoha u sa mathe. U ka tšoha u sa hoeletse. Empa ntho e tla etsahala, u tla tseba, u tla tseba hobane ntho e etsahetse. Bophelo ba hau bo tla nyalana le hoo hantle, ha feela u ntse u phela. 'Me mohla hora ea ho qetela e fihlang 'me u siea lefatše lena, u ke ke oa tšaba bobbe. "Hobane U na le 'na. Lere la Hau le seikokotlelo sa Hau, li tla ntšelisisa." Mohla ngaka e u tetseng, 'me u tsamaile, 'me methapo e batang e nyoloha.

⁹⁴ Joaloka Mongh. Vauder bosiu bo bong, ramotse oa rōna ea tummeng mona, ho ea utloa Mongh. Nixon a bua, o shoetse temeng hantle. Monna ea koenneng, ea phetseng hantle, kamoo ke tsebang.

⁹⁵ Ke tla tloha lapeng, ke khutle, mohatsa ka o itse, "Billy, na u tsebile *Sekete-kete* o shoele?"

⁹⁶ Tsatsi le leng, ngoanana oa ka o ne a lutse sekolong holimo mona, le ngoanana e monyenyanane, ka Labone, 'me ka Sontaha ba mo pata. A tšoaroa ke pneumonia. Ea kena pelōng ea hae kapa ho hong, 'me (eèna) ea 'molaea. O ne a shoele.

⁹⁷ 'Me motsoalle oa ka, Mof. Williams ka mona, mohatsa Buck William, ke mo tsebile lilemo. Zella Brakeman mona, o teng ka mohahong kae-kae, ke khaitseli ea hae, ba neng ba lula hantle mona, monyako o bapileng, ka lilemo, ha re ne re lula ka mose ho seterata. Ho ikela; o ne a batla a le methapo, empa o ne a iketse mohla ke khutlang.

98 Le bona seo e leng sona? Ka nako e 'ngoe, ke, o tliš' o kopana le eona. 'Me chelete eohle eo u ka e bokellang, metsoalle eohle eo u ka e bokellang. . . Tseo li itoketse. Empa, tseo tsohle, e ke e be taba ea bobeli. Lumela Molimo oa histori, hore Ke Molimo oa letsatsi la joale, ka ho tšoana feela, bona seo A tlang ho u etsetsa sona.

99 Ho lona ba kulang le ba hlokang, ngaka e le hlobohile 'me ha e sa tla le etsetsa letho. Hopolang, Molimo oa histori ke Molimo o tšoanang kajeno.

Ha re rapeleng nakoana feela joale, re sa inamisa lihlooho tsa rōna.

100 Haeba bao ba le teng ka mona bosiuang bona, ha ke tsebe, haeba bao ba le teng ka mona, bosiuang bona, ba tsebang, bakeng sa pholoso ea moea oa hau, hore ha Molimo O tšepisitseng hore O tla tla ka motsotso, ka ho panya ha leihlo, mohla le sa hopolang, ha u se na Eèna, u mpa u nahana hore u na le Eèna, u hopole, "Tsela e ka bonahala e lokile, empa pheletso ea eona ke litsela tsa lefu," ha u sa kholiseha hore—hore u bolokehile, bosiuang bona, 'me haeba A ka fihla, u tla tsamaea le Eèna, na u ka Mo phahamisetsa letsoho la hau, 'me ka ho etsa joalo, u re, "Nkhauhele, Molimo"? Kea leboha. Molimo a u hlohonolofatse. Matsoho a mangata a phahame. E mong a ka ba teng pele re koala? Na u ka. . . le ho rapela. Molimo a u hlohonolofatse, mosetsana. U se ke ua hlajoa ke lihlong joale. Ruri.

101 Ho thusa'ng ho rera Molimo oa histori, haeba E se Eèna kajeno? 'Me, moena, khaitseti, ke bua sena. Nkile ka bala ka Molimo oa histori. Nkile ka bala ka Eèna libukeng. Ke balile ka Eena Bibeleng. Empa ka tsatsi le leng ka kopana le Eena. Ka kopana le Eena. O tliše ho 'na. O mpoleletse ho se noe, ho se tsube le—le ho itšilafatsa, 'me O ne a mpoloketse ho etsa ho hong mohla ke hola-holang. Ke ne ke le moshanyana feela. O—O pakile hoo. O e entse. Setšoantšo sa Hae ke sena se leketlile hantle mona joale, mohla mahlale a se katlalitseng. Ua bona? Lefatše le a e tseba. O e kholisitse har'a lōna. O tseba mohopolo o mong le o mong o pelōng ea hau. O Ipakile. Esale Molimo oo kajeno. Ha se Molimo oa histori.

102 U se ke feela oa. . . lumella lefatše ho u kobotetsa ka sekhukhu ka mosili le linyee tsa lefatše. Mo lumele hona joale. . . [Sekheo lebanteng—Mohl.] Na u ka phahamisa letsoho la hau? Ba bang ba eso etse joalo, na u ka phahamisa letsoho la hau, ho re, "Molimo, ha ke na bonnete ba eona, empa ke batla ho kholiseha. E re ke. . ."

103 Molimo a u hlohonolofatse, mohlankana. Motho e mong? 'Me Molimo a u hlohonolofatse, morao mono, khaitseti. Molimo a u hlohonolofatse, moena. Motho e mong? Molimo a u hlohonolofatse, khaitseti. Molimo a u hlohonolofatse, koana, moena. Ke hantle.

104 U re, “Moena Bill, na e ka bolela letho ho ’na, ho phahamisa letsoho la ka?” U phahamise letsoho la hau, hang, ’me u fumane. Kamehla, moena, khaitseli, ha u etsa ntho e lokileng, u ikutloa monate ka eona.

105 Tšepahala. Joale, u se ke ua bua leshano ho Molimo. Ha u bua leshano ho Molimo. O a tseba. U ntse u ithetsa e le uena. Le a tseba, leshano ke ntho e nyarosang hakana, hoo ba ka u isang makhotleng a federale le makhotleng a bosenyi, le—le ho tlamella moutulla leshano sephakeng sa hau, ’me u ka leka ka bokhoni ba hau ho bua ntho eo, ho e etsa e utloahale e tsoana le ’nete, empa methapo ea hau e tla paka hore u bua leshano. Hobaneng? Ha u a etsetsoa ho bua leshano. ’Me haeba selemoha leshano se tseba, ho ka thoeng ka Molimo?

106 U re, “Empa, moena, ke Mobaptise. Ke Mopresbeteriene. Ke Momethodise.” Hoo ho itoketse.

107 Ke u botsa ntho e le ’ngoe. Na u kile ua kopana le Molimo ona oa histori? Na O kile a ema sehlahleng se tukang ka pel’a hau, ’me u a tseba? ’Me O arabetse moea oa hau, ’me u a tseba libe tsa hau li nyametse? Haeba ho se joalo, u se ke ua hakanya ka ho ingolisa kerekeng feela, kapa ho nyolohela mono le ho ikutloa monate ka eona. U tlameha ho Mo tseba. E seng ho utloa ka Eena, e seng ho fumana mahlohonolo a Hae, ke Bophelo. Empa, ho Mo tseba, ke Bophelo; ho Mo tseba, ho Mo tseba ka seko; *Eèna*, lereo la motho, ho Mo tseba. Ha se ho tseba Buka ea Hae, e seng ho ba moithuti ea lokileng, e seng ho ba setho se lokileng, kapa monna ea lokileng kapa mosali ea lokileng. Ha e sebetse; molao o entse hoo. Empa, ho Mo tseba! Na u kopane le Eèna? Na Molimo oo, o buileng le Moshe sehlahleng se tukang, o tlile ka pel’a hau? Na u Mo utloile a bua le uena, ho fihlela u tsebile hoba e ne e le Eèna? Haeba A eso etse joalo, phahamisa letsoho la hau feela, ho re, “Molimo, bua le ’na joale. Na ke Uena ea bobolang pelōng ea ka? Ke—ke batla ho U tseba.”

108 Molimo a u hlohonolofatse, leleiti le lecha. Molimo a u hlohonolofatse, morao mono. Ke botle. Ke hantle. Motho ea eso etse joalo. Ke hantle. Molimo a u hlohonolofatse, khaitseli. Molimo a u hlohonolofatse, mofumahatsana, mona. Ke botle. Molimo a u hlohonolofatse, mofumahatsana ka mona.

109 Joale ka khutso ea ruri, le inamisitse lihlooho tsa lōna, le e binele ka marameng.

Jesu o tla tla, ho chabe letsatsi le bosehla;
Lintoa li tla hloloa tsohle, ho chabe letsatsi le
bosehla,
Re tla hooa tlhoho, re phunye boputsoa,
Ho chabe letsatsi le bosehla, ho ’na le uena.

110 Joale, lona ba phahamisitseng matsoho a lona, le lakatsang lithapelo tsa ka ho lona, ’me le lumela Molimo o tla nkutloa, u batla ho nyolohela mona aletareng, e re ke eme mona ke rapele

le uena, nakoana. Aletare e butsoe. Molimo a u hlohonolofatse, moena. Ke hantle. Molimo a le hlohonolofatse, banna. Molimo a u hlohonolofatse, khaitseli. Ema hantle u nyolohe. Ha u lumela Molimo o tla u thusa, le ho utloa thapelo, hore ke u thuse ho tla ho Eena, ho Mo tseba, nyolohang hantle joale. Na le ke ke?

Ho chabe letsatsi le bosehla, Jesu . . .

111 Re tseba joang hore e ke ke ea hlaha hoseng?

. . .lintoa . . .

Ntoa u e loanang hona joale, na u ke ke oa e lumella ho hloloa hona joale, ke hona? E ke e haptjoe hona joale, le tle le hoeletse tlhoho.

Ho chabe letsatsi le bosehla, ho 'na le uena.

Ho chabe letsatsi le bosehla, Jesu . . .

112 Emang hantle feela, ho lokile, 'me u hate u nyolohe hantle, ka mathoko.

. . .lintoa tsohle li hlotsoe,

Re tla hoeletsa tlhoho, re phunye boputsoa,

Ho chabe letsatsi le bosehla . . .

113 Na u ke ke ua tla joale, re sa lebeletse? Re tla u thusa mona, thapelong. Thapelo ea tumelo e re etsetsa tse ngata. Na u ke ke ua tla? Ke le qophella ho tla, ho amohela Molimo oa nako ea joale. E seng feela e—e molimo, ha u ea kerekeng 'me u re, "Be, ke ngolisitse kerekeng." Molimo oo o ke ke oa sebetsa. Molimo oa Methodise, molimo oa Baptise, molimo oa Presbeteriene, molimo oa Pentekosta, e ke ke ea sebetsa. Fumana Molimo oa Bibebe ena. Molimo oa Pentekosta o tla tsoa o kene lefatšeng; molimo oa Methodise, kapa molimo oa Baptise, kapa molimo ofe oa mokhatlo oa bolumeli. Empa Molimo oa Bibebe ena, o tla u sebetsa joaloka Jesu. Ruri O tla etsa joalo. Moea oa Hae o tla aha ka ho uena, 'me bophelo bohle ba hau bo tla fetoha; mabifi ao, lonya leo, moea oo o sa tšoareleng, ntho eo e tla bolisa moea oa hau Bosafeleng bo timetseng.

114 Ke mpa ke lahlela letlooa joale. Ho ho lona. Le saleng morao, na le ke ke? Tsoang hantle, le pote aletare mona. Bongata ba lōna le phahamisitse matsoho a lōna morao mono. Batho ba tla u emisa, litulong tsa bona. Morena a u hlohonolofatse, mohlankana.

115 Joale a sa letsa 'mino hasesane, ba 'maloa ke bana ba eme aletareng. Meea e supileng e tlileng kapele ho ema aletareng. Na le tsebile supa ke palo e phethehileng ho Molimo, phetheho? Moea o Halalelang o sa tsoa theohela holim'a motho ea emeng mona, hona joale feela. Ke seo ke se bitsang Moea o Halalelang, moena.

116 Joale O teng mona, ho e mong le e mong oa lona. Ikokobetseng lipelōng tsa lona feela. Ho ka thoeng haeba lena

e le lekhetlo la ho qetela u tla ema aletareng, ena e le thapelo ea ho qetela eo u tlang ho e bua, hona joale? Jesu o tla fihla. A ka kokota monyako oa hau pele ho hosasa, u a tseba. U loketse ho tsamaea, tsatsi le leng. 'Me haeba e le Molimo oa tsohle, Ke Molimo oa histori, 'me Ke Molimo oa kajeno.

117 O buile le uena. U phahame mona ka pel'a Hae, ho kopana le Eëna. U tllile kapele ho kopana le Eëna. O tla kopana le uena. O eme hantle mona joale. Feela, ka pelōng ea hau, ipolele sohle seo u se entseng se phoso. E re, "Molimo, nkhahele, 'na moetsalibe. Ke sitiloe 'me joale ke—ke ipolela, ka pelō ea ka eohle, hore ke phoso. Ke batla hore U nkhahele le ho ntšoara libe tsa ka. Ke—ke tla U sebeletsa letsatsi lohle la ka. 'Me mollo o monyenyane ona o tukang pelōng ea ka, tumeloana, e nchochileng ho nyolohela mona aletareng ena, bosiu bona, e ke e itsoarelle botebong ba moea oa ka. E ke e itsoarelle hantle mona joale. 'Me ntho e a tuka, e mpoellang feela, 'E, U a phela, Jesu.' 'Me kea U rata. 'Me ke tla U bona temeng lihoreng tse 'maloa tse latelang, u etsa lintho, lintho tse khōlō. Ke thabile haholo ha ke tllile kapele ha U ne u bua le pelo ea ka. Ke tla U bona u etsa hore mefetše e tlohe bathong, ho folisa bakuli le bahloki. Ho ba utloa ba khutla, ba paka seo Molimo o ba etselitseng sona; Molimo oa histori, O nyolohileng nalaneng, 'me esale Eëna kajeno, o fihla temeng. Hobane, khetlong lena O tla ho tla lula; ho Tla ha Hae labobeli."

Ha re rapeleng joale. Le rapele le 'na, e mong le e mong oa lona.

118 Molimo o ratehang, ke tllisa pela Hau hona joale, ba supileng bana. Bosiu ba pele bo hlhisitse linaleli tse supileng tse kherang. U boletse, Lentsoeng la Hau le theko e thata, "Ha ho ea ka tlang ho 'Na, a sa huloe ke Ntate oa Ka pele. 'Me ea tlang ho 'Na, Nke ke ka mo lahlela kantle, empa ho mo nea Bophelo Bosafeleng, le ho mo tsosa letsatsing la bofelo." Morena, eo ke tšepiso ea Hau. 'Me ka maikutlo, ketso ea kholiseho, meea e supileng ena e theko e thata e kherang e hatile e tla kapele bosiu bona, hobane ba lumela hore Molimo o buileng le baporofeta, Molimo o buileng le monna oa sefofu, O sa phela le kajeno. 'Me ba tsoela kapele ho kopana le Eena.

119 Oona Molimo O entseng tšepiso, oa kopana le molepera mabaleng a hae, O kopaneng le mosali oa phallo ea mali lebopong la noka, O kopaneng le lefu lebitleng la Lazaro 'me oa mo khutlisa, ke 'ona Molimo bosiu bona, O emeng mona ho khahlana le lefu lena la moea le ho mo khutlisa, le ho re, "Tlosa matsoho a hau ho bana ba tllileng ho Mpoela ka khothaletso ea Moea oa Ka. Ke tla ba fa Bophelo Bosafeleng, 'me ha ho ea ka ba utlang ho 'Na. Ke tla ba tsosa letsatsing la bofelo."

120 Re U leboha ka bona, Ntate. 'Me re rapela hore ba tla lula ba tšepahetse matsohong a Hau, ho fihlela lefu le ba lokolla.

Mohla ba kenang menyakeng ea Morena, ka letsatsi le leholo leo, mohla Selallo sa Lenyalo se beoang lipakapakeng, mohla Morena a tsoang 'me a re, "Le sa hopola letsatsi leo la pele la Mphalane, 1958, tabernakeleng e nyenyane eo ea konkreiti? U nyolohile ua Nkuka ke le Mopholosi oa hau. Ke buile le uena. U ne u le moetsalibe mohleng oo, empa joale Ke u pholositse. 'Me joale u oa Ka, 'me u ruile Bophelo Bosafeleng. Joale kena menyakeng eo Ke u lokiselitseng eona, ho tloha motheong oa lefatše." Aba sena, Morena. Ke ba Hau joale. Re ba laelets'a ho Uena, ka Lebitso la Jesu Krete. Amen.

Joale ka lihlooho tsa lōna tse inamisitsoeng, letšoele.

¹²¹ Ke tlil'o kopa e mong le e mong oa lona mona aletareng. Na u a utloa, tlase pelōng ea hau joale, ho tsoa matebong a moea oa hau, lelakabe leo la tumelo le u laetseng ho tla kapele aletareng mona, ho phethisa ketso ena eo u e entseng joale, ka mora ho phahamisa matsoho a hau le ho tsoela kapele, na u utloa lelakabe leo le qala le tuka nqa tumelo ea makhonthe e phelang pelōng ea hau? 'Me joale u a lumela Jesu o tšoareitse libe tsa hau, 'me u tla ba oa Hae ho tloha joale ho ea pele? Haeba u etsa joalo, na u ka Mo phahamisetsa letsoho la hau le letona? Ba potileng aletare, phahamisa letsoho la hau le letona, ha u utloa Jesu a u tšoareitse libe tsohle tsa hau. Ea potileng. . . Joale, ho na le matsoho a mabeli, a mararō, a sa phahamang. Joale lulang le rapela feela, e mong le e mong. 🕊

58-1001 Ho Mo Nyolla Nalaneng
Branham Tabernacle
Jeffersonville, Indiana U.S.A.

SOUTH SOTHO

©2025 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Krete. Buka ena e ke ke ea rekisoa, ea boela ea hlalisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fua boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org